

Եղևիկ և Շղարշիկ համայնքների բնակիչներն իրենց խնդիրները ներկայացրեցին ՏԿԱԻ նախարարին

21:46 / 23.06.2015

Յունիսի 23-ին ՀՀ ՏԿԱԻ նախարար Արմեն Երիցյանն այցելել է Արագածոտնի մարզի Եղևիկ համայնք և հանդիպել համայնքի բնակիչներին: Նախարար Ա. Երիցյանին ուղեկցում էին Արագածոտնի մարզպետ Սարգիս Սահակյանը և Ջրային տնտեսության պետական կոմիտեի (ՉՏՊԿ) նախագահ Արամ Հարությունյանը: Այցի նպատակն էր քննարկել Եղևիկ և հարևան Շղարշիկ գյուղերի միջև երկար տարիներ անկառուցելի և խմելու ջրի խնդիրը:

Արագածոտնի մարզպետ Ս. Սահակյանն ու Եղևիկի համայնքապետ Աշոտ Առաքելյանը նախարարին ներկայացրեցին խնդրի էությունը: Տարիներ շարունակ երկու հարևան համայնքների՝ Եղևիկի և Շղարշիկի բնակիչները չեն կարողանում կիսել խմելու և ոռոգելի ջրի պաշարները: Ըստ եղևիկցիների՝ Շղարշիկ համայնքն ունի իր ջրային կարիքները բավարարելու այլ միջոցներ՝ մասնավորապես գյուղում գործում է սելավատար, կա լիճ և ստորգետնյա աղբյուրներ, միևնույն ժամանակ Շղարշիկցիները պարբերաբար փակում են Եղևիկը մուտցող ջրատարը և ջուրն ուղղորդում իրենց համայնք՝ ընդ որում խոսքը թե՛ խմելու, թե՛ ոռոգելի ջրի մասին է: Նախկինում խնդրի լուծման համար առաջարկվել են մի շարք նախագծեր, որոնք կյանքի չեն կոչվել: Մասնավորապես, Եղևիկ գյուղի համար նախատեսված է եղել կառուցել 2.5 կմ երկարությամբ առանձին ջրագիծ, որի մի մասի կառուցումը պետք է իրականացվեր եղևիկցիների միջոցներով, սակայն նախագիծը ավարտին չի հասցվել համայնքի բնակիչների սուղ միջոցների պատճառով:

ՉՏՊԿ-ի նախագահ Ա. Հարությունյանը խնդրի լուծման համար առաջարկեց համայնքի ջրային պաշարների տնօրինումը հանձնել ՉՏՊԿ-ին, քանի որ այս հարցում չկա միասնական և պետական մոտեցում, ինչպես նաև համայնքի ջրառն այսօր անօրինական է:

- Մեր տնօրինության տակ լինելու դեպքում կբարելավենք համայնքի թե ներքին, թե արտաքին ջրային ցանցը: Մեր միջոցներով կկառուցենք օրվա կարգավորիչ կայան, ինչպես նաև կսահմանվի ջրավարձի միասնական սակագին: Սակայն սա ճանապարհներից մեկն է, որը մենք չենք պարտադրում և ընտրությունը թողնում ենք ձեզ, - նշեց Ա. Հարությունյանը:

Խնդրին ծանոթանալուց հետո ՏԿԱԻ նախարար Ա. Երիցյանը համայնքի բնակիչներին առաջարկեց ստեղծել ոլորտի մասնագետներից բաղկացած հանձնաժողով, որը կուսումնասիրի և տասն օրվա ընթացքում կտա մասնագիտական եզրակացություն: Նախարարը նշեց նաև, որ մասնագիտական եզրահանգումն անհրաժեշտության դեպքում կներկայացվի նաև վարչապետին, և հնարավորինս շուտ լուծում կստանա:

- Յուրաքանչյուր համայնք ունի իր յուրովի խնդիրները: Ես քաջատեղյակ եմ, որ գյուղացու կյանքը դժվար է, սակայն հավատացե՛ք, որ սահմանամերձ համայնքներում վիճակն ավելի ծանր է, քանի որ ազգաբնակչությունը հակառակորդի կրակահեղձի տակ է: Ձեզ մոտ եկել եմ որպես բարեկամ, եկել եմ ձեր առաջարկները լսելու: Գիտեմ, որ ձեզանից լավ խնդիրն ոչ ոք ծանոթ չէ: Ուստի՝ եկե՛ք միասին լուծենք այս հարցը: Կարծում եմ՝ խնդիրը մինչ այսօր չի լուծվել կառուցողական քննարկման և երկխոսության բացակայության պատճառով, - եզրափակեց նախարար Ա. Երիցյանը:

Եղևիկ համայնքի բնակիչների մեծ մասը ոգևորությամբ ընդունեցին նախարարի առաջարկը: Արդյունքում՝ առաջիկա օրերին կստեղծվի մասնագիտական խումբ, որը ոլորտի պատասխանատուներին կներկայացնի երկու համայնքների ջրային պաշարների բաշխման օպտիմալ տարբերակ: